

Léargas Ginearálta ar an Modúl

Sa mhodúl seo, breathnófar ar dhá ghné de scríbhneoireacht na Gaeilge comhaimseartha – an gearrscéal agus an t-úrscéal. Léifear agus scrúdófar ceithre ghearrscéal agus úrscéal amháin le linn an mhodúil seo.

Aidhm an Mhodúil

- Is é aidhm an mhodúil seo léargas a thabhairt duit ar chuid de scríbhneoirí agus scríbhneoireacht phróis na Gaeilge comhaimseartha.
- Tabharfar deis duit dul i ngleic le saothair i nGaeilge chun do chuid scileanna anailíse agus léirmheastóireachta a fhorbairt.
- Spreagfar thú chun do chuid smaointe agus tuairimí féin a nochtadh maidir leis na saothair éagsúla.

Torthaí Foghlama an Mhodúil

Nuair a bheidh an modúl seo críochnaithe agat beidh tú in ann:

- Scéalta éagsúla comhaimseartha trí Ghaeilge a phlé agus a mheas.
- Scileanna teanga a fhorbairt de bharr na léitheoireachta.
- Príomhthéamaí agus mórpointí i scéalta a aithint.
- Comparáidí agus cosúlachtaí i scéalta a thabhairt faoi deara.

Struchtúr an Mhodúil

Beidh an modúl leagtha amach ina dhá chuid. Beifear ag díriú ar an ngearrscéal ar dtús ar feadh cúig seachtaine. Déanfar plé agus anailís ar cheithre ghearrscéal atá luaite i dteidil na n-aonad. Ansin, díreofar ar an úrscéal atá leagtha amach don mhodúl, *Gluaiseacht* le hAlan Titley.



Cuirfear ceisteanna plé ar shuíomh Blackboard gach seachtain agus mar sin tá sé thar a bheith tábhachtach go mbeidh na gearrscéalta agus an t-úrscéal á léamh agat le linn an mhodúil chun páirt ghníomhach a ghlacadh sa phlé sin.

Déanfar tagairt do léitheoireacht bhreise freisin a bheidh le léamh agat chun cur le do thuiscint ar phrós comhaimseartha na Gaeilge.

Beidh béim ar théamaí faoi leith a bheidh le feiceáil sna scéalta éagsúla, chomh maith leis na cosúlachtaí agus na difríochtaí sonracha iontu.

Beidh an teagascóir ar fáil ag amanna socraithe gach seachtain chun ceisteanna a fhreagairt agus a phlé.

Achoimre ar Ábhar an Mhodúil

Aonad 1. Réamhrá agus Plé ar an nGearrscéal: Déanfar plé ginearálta ar sheánra liteartha an ghearrscéil agus ar na tréithe is coitianta a bhíonn le sonrú ar an ngearrscéal comhaimseartha sa Ghaeilge. Breathnófar ar thábhacht an ghearrscéil i scríbhneoireacht na Gaeilge chomh maith.

Aonad 2. An Gearrscéal *Na Déithe Luachmhara* le Pádraic Breathnach: Pléifear an scéal féin agus na téamaí nó na smaointe a thagann chun cinn sa scéal seo.

Aonad 3. An Gearrscéal *An tAthair, an Mac agus an Seanbhuachaill* le Pádraig Ó Cíobháin: Pléifear an scéal féin agus na téamaí nó na smaointe a thagann chun cinn sa scéal seo.

Aonad 4. An Gearrscéal *Tuatha Dé Danann* le Seán Mac Mathúna: Pléifear an scéal féin agus na téamaí nó na smaointe a thagann chun cinn sa scéal seo.

Aonad 5. An Gearrscéal *Faoi Scáth Scáile* le Mícheál Ó Conghaile: Pléifear an scéal féin agus na téamaí nó na smaointe a thagann chun cinn sa scéal seo.

Aonad 6. Réamhrá agus Plé ar an Úrscéal: Pléifear an t-úrscéal sa Ghaeilge; déanfar tagairtí d'úrscéalta difriúla atá ar fáil sa Ghaeilge agus na téamaí agus na topaicí a thagann chun cinn iontu. Cuirfear tús le léargas ginearálta ar an úrscéal *Gluaiseacht*.

Aonad 7. An tÚrscéal *Gluaiseacht* le hAlan Titley: Caibidlí 1–2: Cíofar mórphointí na gcaibidlí. Déanfar tagairtí do phríomhthéamaí na gcaibidlí sin agus d'aon cheisteanna morálta a thagann chun cinn iontu.

Aonad 8. An tÚrscéal *Gluaiseacht* le hAlan Titley: Caibidlí 3–4: Déanfar dul siar ar mhórphointí eolais na gcaibidlí seo. Beifear ag déanamh tagairtí do théamaí agus do smaointeoireacht na gcaibidlí.

Aonad 9. An tÚrscéal *Gluaiseacht* le hAlan Titley: Caibidlí 5–6: Cíofar mórphointí na gcaibidlí. Déanfar tagairtí do phríomhthéamaí na gcaibidlí sin agus d'aon cheisteanna morálta a thagann chun cinn iontu.

Aonad 10. Súil Siar ar an gCúrsa: Dul siar a dhéanamh ar an dá chuid den chúrsa – an gearrscéal agus an t-úrscéal – agus ar na téamaí a eascraíonn astu.

Measúnacht

Scrúdófar an modúl seo trí úsáid a bhaint as na modhanna measúnachta seo a leanas:

Modh Measúnachta	Marc
Aiste	60%
Plé ar Blackboard	20%
Quizeanna/Ceistneoirí	20%

Aiste Shamplach

- **Úrscéal:** ‘Léirítear coinsias sóisialta an údair go soiléir san úrscéal seo.’ An ráiteas seo a phlé.
- **Gearrscéal:** ‘Céard iad na téamaí coitianta a fheictear sna scéalta atá léite agat don mhodúl seo?’

Quiz Samplach

Gearrscéal:

1. Céard iad na scéalta sa mhodúl a raibh béim iontu ar an áit dúchais?
2. Céard iad na cosúlachtaí idir Máire (*Na Déithe Luachmhara Deiridh*) agus an Mac (*An tAthair, an Mac agus an Seanbhuachaill*)?
3. An bhfuil deirí na ngearrscéalta cosúil lena chéile? Píoc dhá scéal a bhfuil deirí comónta acu agus mínigh go gairid cén fáth.
4. Céard iad na cosúlachtaí atá idir Fearghus in *Tuatha Dé Danann* agus Máire in *Na Déithe Luachmhara Deiridh*?
5. An bhfuil *Faoi Scáth Scáile* difriúil leis na scéalta eile? Mínigh cén fáth. (Níos lú ná 250 focal.)
6. An bhfeictear greann in aon cheann de na scéalta seo? Tabhair samplaí gonta.
7. Déan liosta de na mothúcháin a thagann chun cinn i do rogha dhá scéal agus tabhair samplaí le tacú le do thuairim.
8. Cén gearrscéal ab fhearr leat? Déan cur síos gairid ar do rogha gearrscéil.

Úrscéal:

1. Déan cur síos gairid ar an údar.
2. Cén fáth a raibh ar an ógánach a cheantar dúchais a fhágáil?
3. Cén chaoi a dtaispeánann an t-údar ollspás cheantar an ógánaigh?
4. Cén tábhacht a bhain le 'Fear na hOíche'?
5. Déan cur síos gonta ar an gcaidreamh idir Fatima agus an reacaire.
6. Cén sórt íomhá a bhí ag na hógánaigh den Eoraip?
7. Cén cheist a chuireann Fatima go minic agus í san Eoraip?
8. Céard a insíonn Omar dúinn faoi shaol na dteifeach?
9. Tabhair cuntas gairid ar dhá eachtra ón téacs a thaispeánann soineantacht an reacaire.
10. Ainmnigh ceithre dhifríocht a thagann chun cinn, idir an Afraic (ceantar dúchais na n-ógánach) agus an Eoraip.



Ceist shamplach ar an bhFóram Plé ar Blackboard:

- **Gearrscéal:** An críoch éadóchasach a bhí leis an scéal seo, *Na Déithe Luachmhara Deiridh*, dar leat?
- **Úrscéal:** Cé na chéad smaointe a rith leat nuair a léigh tú an chéad alt sa leabhar? An ndeachaigh sé i bhfeidhm ort? Inis cén chaoi.

Treoir ghinearálta maidir le leagan amach na haiste:

Beidh idir 1,000-1,500 focal le scríobh san aiste.

Scrúdaigh an liosta seiceála seo a leanas sula scríobhfaidh tú dréacht deiridh d'aiste agus scrúdaigh arís é sula leagfaidh tú isteach d'aiste.

1. Ba cheart go mbeadh leathanach clúdaigh leis an aiste ar a mbeidh:
 - » teideal na haiste
 - » ainm an mhic léinn
 - » ainm an chúrsa
 - » ainm an léachtóra
 - » an dáta a leagtar isteach an aiste
2. Ba cheart go gclóscríobhfaí an aiste agus na n-úsáidí spásáil dhúbailte.
3. Bí cinnte go mbeidh uimhreacha ar na leathanaigh.

4. Fág orlach (imeall 2.5) ar thaobh na láimhe deise agus ar thaobh na láimhe clé de gach leathanach.
5. Ní mór an aiste a chur chuig an léachtóir ar an dáta ceart. Beidh an dáta le fáil ar Blackboard nuair a thosóidh an cúrsa.
6. Déan profáil chúramach ar d'aiste sula leagfar isteach í.
7. Coinnigh dhá chóip de d'aiste duit féin.
8. Bí cinnte go bhfuil na nithe a leanas i d'aiste:
 - » Réamhrá: an méid a bheidh á phlé agat san aiste, na cuspóirí atá agat.
 - » Corp na haiste: pointí na haiste le plé anseo.
 - » Críoch na haiste: ina gceanglaíonn tú do cuid smaointe le chéile.
9. Bain úsáid as Córas Harvard agus an aiste á scríobh.
10. Ní mór leabharliosta a chur leis an aiste (Córas Harvard).
11. Má úsáideann tú foinsí i d'aiste, luaigh cá bhfuair tu iad chun bradaíl liteartha a sheachaint.
12. **Is féidir treoir a fháil maidir le cúrsaí tagartha agus bradaíola ar shuíomh idirlín Roinn na Gaeilge ag:**

<http://www.nuigalway.ie/gaeilge/faisneis/faisneis3.html>

Scéim Mharcála don Aiste:

Eolas	30%
Anailís	35%
Cruinneas	10%
Leagan amach/Leanúnachas (go croineolaíoch, sna hargóintí)	25%
Iomlán	100%
<i>Tá 60% den mharc iomlán ag dul don aiste.</i>	

Scéim mharcála do gach quiz:

10% do gach ceist

Iomlán: 100%

Tá 20% den mharc iomlán ag dul do na quizeanna/ceistneoirí.

Acmhainní:

Tá dhá phríomh-théacsleabhar ag teastáil don mhodúl seo:

- Ó Conchubhair, B. (2006) *Gearrscéalta Ár Linne*. Indreabhán, Co. na Gaillimhe: Cló Iar-Chonnacht.
- Titley, A. (2009) *Gluaiseacht*. Baile Átha Cliath: An Gúm.

Beidh léitheoireacht bhreise i gceist chomh maith agus tabharfar treoir duit maidir leis an léitheoireacht sin le linn an mhodúil. Seo a leanas liosta de na hacmhainní sin:

Leabhair:

Denvir, G. agus Ní Dhonnchadha, A., 2000. *Gearrscéalta an Chéid*. Indreabhán, Conamara: Cló Iar-Chonnacht.

Ní Dhonnchadha, A., 1981. *An Gearrscéal sa Ghaeilge 1898-1940*. Baile Átha Cliath: An Clóchomhar.

Ailt:

De Paor, L., 1998. 'An Scéalaíocht', *Téacs agus Comhthéacs*. Eag. Ní Annracháin & Nic Dhiarmada. 8-34.

Breathnach, P., 1996. 'Aiste: an tionchar a bhí ag Ó Cadhain orm'. *Comhar*, 21-24, Nollaig. Ar fáil ar **JSTOR** ag: <http://www.jstor.org.libgate.library.nuigalway.ie/stable/25573115>

Mac Cóil, L., 1981. 'Léirmheas – Na Déithe Luachmhara Deiridh'. *Comhar*, 25-26, Meitheamh. Ar fáil ar **JSTOR** ag: <http://www.jstor.org.libgate.library.nuigalway.ie/stable/20554720>

Ó Muirthile, L., 1989. 'Agallamh na míosa: Liam Ó Muirthile ag caint le Seán Mac Mathúna' *Comhar*, 4-6,8, Deireadh Fómhair. Ar fáil ar **JSTOR** ag: <http://www.jstor.org.libgate.library.nuigalway.ie/stable/25571120>

De Bluit, P., 2010. 'Gluaiseacht le Alan Titley, Léirmheas le Peadar de Bluit'. *Feasta*, 26, Márta.

Ní Chinnéide, M., 2010. 'Gluaiseacht Liteartha'. *Comhar*, 23-24, Márta. [Ar líne]. Ar fáil ag: <http://www.iriscomhar.com/leirmheastoireacht.php?PHPSESID=cd8ed515743e02b7f1e55c0aef9d23e9>

Ó Gairbhí, S.T., 2010. 'Reviews: Gluaiseacht by Alan Titley'. *The Irish Times*, 6 Márta. [Ar líne]. Ar fáil ag: <http://www.gaelport.com/default.aspx?treeid=37&NewsItemID=4042>

Suíomhanna Idirlín:

- Agallamh le Mícheál Ó Conghaile, Lúnasa 2010 – [Beo.ie](http://beo.ie)
<http://beo.ie/alt-micheal-o-conghaile.aspx>
- Niall Tóibín ag léamh ceann de scéalta Sheáin Mhic Mhathúna
http://www.youtube.com/watch?v=SM_J33TW2A0
- Agallamh le hAlan Titley, Bealtaine 2004 – [Beo.ie](http://beo.ie)
<http://beo.ie/alt-alan-titley.aspx>